

陸宣公集一

6-3

30

Q



陸苑四
宜集卷
汪公
翰

平潭李氏師
竹堂藏版

唐陸宣公翰苑集注序

余觀唐宋中興名臣有王佐才而未竟所用者陸宣公
李忠定公二人而已嘗愛讀其集謂足壯膽識益神智
出入輒以自隨今老矣無所復用於世又病廢學二書
束而不觀者已數歲今來新安得見歙侯張君蓀圃所
注宣公翰苑集注徵引繁博考核精密於唐事尤詳焉
顧念是集非經生家辨囿之所聚詞章家漁獵之所及
上之奏議無所用其體下之帖括無所資其助夫孰從
而好之讀之注之哉今之所好所讀所注者或詩或賦

或古今試帖或賦彙諸題擣摭勦販用爲剽竊之具而
小夫俗儒人手一編珍爲鴻寶雖六經諸史未盡寓目
其他則又何說而君顧讀人之所不必讀注人之所不
必注果好其文與抑不徒好其文與昔者蘇文忠公嘗
好讀宣公文故其稱之曰智如子房而文則過辨如賈
誼而術不踈迄今考之文忠亦殊無愧斯語蓋其素所
蓄積然也然則文忠其宋之宣公乎而君則今之文忠
乎不然而何勤勤於是也嗟乎宣公當日使無延齡之
讒必不貶卽貶矣被召不卽死且復相其所成就當不

止是乃身旣放黜而居亦終以不競以視文忠之以新
法謫忠定之以和議沮千古一轍其可悲也余家宣公
故里東郭外有石梁以公得名兒時過之長老爲余道
公生平心慕之用是愛讀其文旣通籍奉使嶺表泛海
抵瓊臺經文忠忠定二公貶所俯仰憑弔未嘗不歎古
今來用者不才才者不用如三公者正復何限徒傳其
區區之心於殘編斷簡中以供有心人感慨慕悅於易
代之後斯誠其遇之窮乎抑亦有世運焉不可得而強
也君今以盛年遭際

堯舜之世膺民社稱循良駿駿乎向用矣志宣公之志
學宣公之學而遇又過之不可謂非厚幸將來樹立宏
達以不同乎古人者繼古人後而是注其職志也余自
顧少壯碌碌坐廢撫卷追悼彌慙昔賢因爲之序以告
天下欲讀有用之書儲經濟以翊
休運者請自宣公翰苑集注始乾隆戊子季秋月秀水
舊史氏鄭虎文序

唐陸宣公翰苑集注序

生今之世而慕古之人觀乎古人則今人可知已蓋孟子願學孔子賈誼投弔乎屈原諸葛孔明自比於管樂以性之所近爲情之所鍾由今日之嚮往知將來之施設也平定張君蓀圃以進士知新安之歙縣其平生讀書窮極幽遠於古之碩德名賢嘉言美行無不跂而望之以爲不可及而所心儀不置則尤在唐之陸相一人當德宗之世奉天山南蒙塵至再賴武臣戮力於外而陸公常在左右決可否於中降罪已之詔回將去之心

卒能收復舊京宗社無隕公之功爲多德宗貪猜不終
其分而公終始一心進退無閒蓋其爲學本仁蹈義通
古宜今其趨正其守堅居一室而遠見千里之外在今
日而豫知後事之來無毫髮之差有著龜之應而其爲
言愷切開明感心愜聽允爲人臣進言之法式君讀其
文愈重其人論其世遂釋其義非以後之人爲有不知
故爲是箋訓之煩而已當其時兩河用兵民窮財匱藩
鎮之彊盧杞之姦裴延齡之詐安朱泚李懷光之叛亂
而公以一身屏障其閒其所爲納誨陳詞莫非堯舜三

代治世之蹟使後世讀君之注恍然如置身有唐之世
親見陸公而與之上下其議論則注之存豈徒以見公
蓋將教天下萬世之爲人臣莫不懷忠直以事其上也
夫有陸公之文則其君雖不能盡用而其功已著於當
世有君之注則後之人皆將論其世而陸公之學愈以
昭揭於無窮自陸公以來至於今八百餘年矣而君獨
愛慕之如此然則觀陸公可以知君矣桐城劉大櫟序

唐陸宣公翰苑集注自序

經史以載道傳注所以明道也易有十翼尚書有傳詩
有序禮記爲傳春秋有左氏公羊穀梁皆注也漢魏而
下以傳注名家者如孔安國毛萇鄭元何休王弼趙岐
杜預顏師古劉昭裴松之輩其最著者矣注所未盡遞
相詮釋則又有疏于是孔穎達邢昺孫奭之徒咸彬彬
與傳注並傳焉仲尼沒聖人之道衰諸子百家之說紛
然錯出文愈煩詞愈支而道亦愈離一二好古深思之
士掇拾遺編推測排闡聖賢之奧義微辭與夫大經大

法均理天下之至具瞭然表著如揭日月而行中天更
幾千萬世而不至幽晦而不彰注疏之功爲多唐陸宣
公文集權文公德輿所敘次制誥十卷奏草七卷中書
奏議七卷名翰苑集今傳本是已宋紹興二年嵎縣主
簿諱華者進奏議注十五卷今獨其表存而注不傳亦
不載其姓當元祐淳熙之間大臣畱心治具引君當道
屢以奏議勸進講筵而其主亦用傾心嚮慕至以退朝
之後傾聽數千言不爲倦厭幾幾典謨訓誥比隆矣當
斯時德宗播遷山南再幸公開關扈從隨事贊畫興元

詔下聞者無不感奮一切大禮大赦
艱恤優復宣慰招諭遣將命官倉卒填委咸盡事情中
機會卒之鑾輿反正國祚以安觀于德宗之所以失與其失而復得者一
代之興亡可考也及既爲相廼益殫所學區大計決大
疑以體國之忠爲不刊之論洞察時變折衷古今雖當
時不能盡用迨其後皆可見諸施行而有裨于治道視
夫以空文自見者迥不侔矣佩自授書卽嗜公集十餘
年來不自分其不類爰據新舊唐書通典通鑑考其世
以詳其時事其故事古語間引他書第釋事而不加義

倣李善注文選例也自漢唐諸儒專門著述沿至于今
詩賦詞章之學陰陽占候之書皆有註釋稱詳博矣然
其可傳于後而足與古人發明者蓋鮮然則余之爲是
其不能無費辭也與而又何敢自信哉山右張佩芳自
序

唐陸宣公翰苑集註釋

凡例

一書之事典可考而作者之旨意不可強明李善註
文選止引經史不釋述作意義東坡嘗稱之而詆
五臣註爲荒陋茲集據事徵典不妄加義遵李善
注文選例也

一凡引古事古語必載書名其有語義難明者并其
註疏採入

一奏草奏議皆因事獻替有關治具爰考年月事因

事類彙編
據新舊二史通鑑綱目詳註其下制誥昔人所謂駢體也然興元赦文膾炙人口其他改元大禮命官宣慰作於德宗播遷之日時勢固自不同茲亦援据時事俾論世者得以考焉

一地理職官歷代沿革不同茲以唐書爲宗旁採通典通考職官輿地括地諸書悉其源流唐以後不復贅

一公集權德輿所敘次制誥十卷奏草七卷奏議七卷宋元祐中蘇軾等校正進呈劄子止載奏議十